

BICIKLISTI IZ AUSTRIJE POSJETILI VRTIĆ "SUNČANI MOST"

12.09.2011 12:59

MOSTAR, 12. septembra (FENA) - Skupina od 20 biciklista iz Austrije posjetila je jutros integrativni vrtić "Sunčani most" u Mostaru na svom "Putovanju mira na biciklima kroz BiH".

Svi sudionici ove akcije su članovi 'Međunarodnog društva za pomirenje' sa sjedištem u Austriji. Putovanje je započelo 2. septembra iz Beča , a planirano je da završi u Sarajevu 21. septembra na Međunarodni dan mira.

"Putovanje mira na biciklima ima tri glavna cilja i to utemeljiti solidarnost i uspostaviti vezu između ljudi Bosne i Hercegovine i Austrije u Europi, pomoći promoviranju zahtjeva i inicijativa lokalnih mirovnih i ostalih civilnih društava i biti simbol mirnog suživota i ohrabriti volonterski rad vlastitim primjerom", navodi se u priopćenju iz integrativnog vrtića "Sunčani most".

U pratnji direktorice vrtića Biljane Čelan, biciklisti su obišli prostorije vrtića i upoznali se s programom rada. Osnivač ovog vrtića je austrijska organizacija "Diakoniewerk". U svom programu rada vrtić promovira pomirenje i suživot između djece različitih nacionalnosti. Nakon kratkog predaha uz osvježanje i druženja s djecom, biciklisti su nastavili putovanje mira.

Na svom putu do sad su u BiH prošli kroz Banju Luku, Jajce, Donji Vakuf, Prozor i Jablanicu. Nakon Mostara, nastavljaju putovanje kroz Konjic, Srebrenicu, Zvornik, Tuzlu, Žepče, Zenicu i Sarajevo.

(Fena) gp